

**Ulloq 1. januar 2015 inuit A-nik isertitallit sulinermit ilanngaammik pisaleqqullugit Naalakkersuisut akileraartarnermut inatsimmik allangortitsinissaq aningaasalersuinissarlu pillugit nassuiaammik saqqummiusseqqullugit Naalakkersuisut peqquneqarnis-saannik Inatsisartut aalajangiiffigisassaattut siunnersuut. Nassuiaat Inatsisartut 2014-mi ukiakkut ataatsimiilerpata saqqummiuteqquneqarpoq, sulinermit ilangaammik eq-qussinerup aningaasatigut kingunissai 2015-mut Aningaasanut Inatsit pillugu aalajangiinissamut atatillugu pingaarnersuisoqalerpat ilanngunneqarsinnaaqqullugit.**

(Aningaasaqarnermut Nunamullu Namminermit Naalakkersuisoq)

### **Akissuteqaat**

(Aningaasaqarnermut Nunamullu Namminermit Naalakkersuisoq)

### **Siullermeerneqarnera**

Andreas Uldum soqutiginarumik siunnersuuteqarmat Naalakkersuisut sinnerlugit qutsavigerusuppara. Siunnersuut ima paasivara, Andreas Uldumip inuit amerlanerusut suliffeqalersinniarai inuillu suliffeqareersut ilanngaateqartinniarai, sulinissarmi imminut akilersinnaanerus-sammat.

Kingulleq aallaqqaasiullara. Sulineq soorunalimi imminut akilersinnaasariaqassaaq, tamatu–mani Naalakkersuisut Andreas Uldum isumaqatigaat. Nutarterinissat assigiinngitsut Naalakkersuisunit maannakkorpiaq misissortinneqarput, taakkulu ilaatigut kingunerissavaat inuit pisortanit ikiorsiissutinik assigisaannilluunniit pissarsisarneq pinnagu sulinissaq orniginartinne-rulissagaat.

Akileraartarnerup aaqjissuussaanerata ikiorsiissutitullu tunniunneqartartut nutarteriffigineqar-nissaat, sulinermit ilanngaammut ilutigitillugu Naalakkersuisut maanna misissorpaat, tassuunakkut sutigut iliuuseqarnissaq pisariaqarnersoq takusinnaajumallugu ataqatigiissumillu iliuuseqarnissaq siunertaralugu. Sulinermit ilanngaateqartitsinerinnaq sumilluunniit aaqqiinaviannigilaq, inuimmi suliffeqanngerersut sulinissap sulinermit ilanngaateqartitsineq pissutiginnarlugu imminut akilersinnaanera maluginaviannigilaat. Tamatumunngalu pissutaasoq unaavoq:

Innuttaasut suliffeqanngitsut ilaat pisortanit ikiorsiissutinik pisarput. Pisortanilli ikiorsiisarneq ima aaqjissuussaavoq, inuit pisortanit ikiorsiissutinik pisartut sulinermit ilanngaatip sunniutai malugisinaanaviarnagit. Inuit taakku aningaasat atorsinnaasaat allangornaviannigillat, tamannalu sulinissamik orniginnersitsinaviarani.

Inuilli suliffeqartut aningaasat atorsinnaasamik amerlinerat malugissavaat.

Aaqjissuussinerit maannakkut atuuttut atuutsillugit Andreas Uldumip siunnersuutaata sulinerup imminut akilersinnaalernissaanik kinguneqarnissaa qularnarpoq. Sulineq imminut akilersinnaassappat ikiorsiissutit tunniunneqartartut akileraartarnerlu ataqatigiissillugit nutarterif-figisariaqarpavut. Tamanna Naalakkersuisut maanna ingerlappaat.

Ajornartorsiut qulaani pineqartoq pillugu nassuiaasiortoqarnissaa Naalakkersuisut siusinnerusukkut oqaatigereerpaat, matumani ilanngullugit sulinermit ilanngaammik atuutilersitsisoqassappat pitsaaqutissat ajoqutissallu. Nassuiaatissap taassuma 2014-imi ukiakkut ataatsimiinnissamut piareerneqarnissaa sulissutigineqassaaq.

Naalakkersuisut taama oqaaseqarlutik siunnersuutip akuersissutigineqarnissaa inassutigaat.